

Na opinion di Gobierno:

Enseñansa a haya su atencion mereci den discurso di Gobernador Refunjol

ORANJESTAD - Aña Parlamentario 2015-2016 a habri cu su tradicional ceremonianan y discurso di Gobernador di Aruba Fredis Refunjol, kende a repasa varios tema di importancia, entre nan enseñansa.

“Enseñansa ta keda hunga un rol importante den e fase di restructuracion economico di nos pais. E meta final di nos inversionnan financiero, fisico y humano den enseñansa, mester ta pa finalmente mehora e calidad di bida di nos ciudadanonan. P’esey ta sigui innova nos enseñansa, promove activamente ciencia y investigacion, como tambe

aumenta uzo di informatica y telecomunicacion den nos klasnan. Retencion di e alumno y e estudiante te na su graduacion ta un meta riba su mes den e proceso di renobacion di enseñansa. Mas y mas hoben cu un nivel di conocimiento amplio y profundo, ta nifica un empuhe significativo pa cada un di nan y pa henter sociedad.”

Den palabranan bon scogi Gobernador a splica cu un economia basa riba conocimiento ta fundamental pa un prosperidad comparti y sostenibel. Mes importante ta e formacion di un sociedad unda e miembronan ta convivi y comparti cu otro. El a

mentiona cu Gobierno di Aruba lo sigui cu ehecucion di e maneho dirigi na revitalisa y fortifica barionan door di brinda e habitantenan e facilidadnan necesario. E centro nan multifuncional pa servicio publico den diferente distrito, lo duna un aportacion importante den esaki. Mas actividad den bario lo contribui na e maneho integral pa hubentud. Refunjol a indica cu maneho di gobierno ta enfoca pa sigui duna training na esunnan cu ta eherce trabou boluntario y lo establece un red di boluntario especializada. “Lo ehecuta e siguiente fasenan di e proyecto ‘Nos Atardi’, cu lo brinda activi-

dadnan y guia pa hobennan despues di scol. Lo continua cu e trayecto di formacion social y evalua e posibilidad di introduci un trayecto igual pa hende muhe. Como parti di e encargo di formacion cu formado a ricibi, lo cuminsa cu preparacion di e despacho di e ombudsman.”

“E di tres componente pa por crea prosperidad comparti y sostenibel, ta creacion di un sociedad mas saludabel y ecologicamente responsabel. Cu programanan di conscientizacion y un infraestructura mas adecua, nos por bisa cu nos pais a cuminsa move! Nos por constata un aumento den e cantidad di ciudadano di tur

edad cu ta practica deporte of ta haci ehercicio riba un base regular. Esaki ta un logro significativo den cuido di salud di nos comunidad. Cu tempo, esaki lo traduci su mes den reduccion di enfermedad y lo contribui na un isla mas saludabel.” Cu orguyo Gobernador a laga logronan di e deportistanan di Aruba resalta den su discurso. “E exito di nos hoben deportistanan den competencianan internacional, ta muestra di e entusiasmo di hobennan pa practica deporte y di e dedicacion continuo di centenares di boluntario den educacion y formacion civico di nos hobennan pa medio di deporte.”